

黃陂縣志卷之七



同知升銜知黃陂縣事劉昌緒重修
候選道前翰林院庶吉士徐瀛總輯

二程志

祠記

祭文

銘

詩

祭田

跋

惟賢希聖人傑地靈孟子之願學去聖人之世百有餘歲矣程子之望魯則生於一千四百年之後者也士君子生於後世而景仰前徽講明聖學其篤生豈偶然哉世傳二夫子之生有雙鳳投懷之兆殆與元

黃陂縣志

卷七

二程志

一

鳥之降履武之祥尼山之祈禱有先後相似者舊志專紀二程可謂知所重矣今仍之輯二程志

附楊志序賢聖之生厯曠代而特聞環九州而僅見猶稱不世之瑞矧夫鍾於一時萃於一門本於一氣者乎二程夫子三尺童子咸知尊之邇所自來廼生陂邑實全楚盛事舊志僅與人物並列序記雜見藝文今特裒輯其遺事與表章夫子之文詞彙爲一卷名曰二程志竊比春秋特筆遺意云

附志畧序按二程夫子生於陂邑西偏程鄉坊雖曰

本籍河南自其祖諱適者爲黃陂令卒於陂其父珣不能歸後爲黃陂尉遂家焉其夫人侯氏夢雙鳳投懷遂以明道元年壬申生顥明年癸酉生頤今邑中遺跡甚多乃通志不載府志第入流寓今欲僂入鄉賢似恐人以爲侈欲入流寓則葉井叔楊兆傑輩修志者又何以俱入黃陂乎若以朱子河南程氏兩夫子之言爲定則黃陂本汝南三十六陂之一安知宋時不隸於河南乎今仍從舊縣志以二程另作一傳並其祠宇與廢游覽事跡後人景慕文詞合爲一帙俾覽者有所考焉

黃陂縣志

卷七

二程志

二

祠

祠在魯臺山下明景泰間同知蔡公綬建成化間知縣李公恆改舊祠爲昌堂復建新祠於前左轄鄭公寅定春秋俎豆隆慶間蘇公景和復建堂於後祀大中公萬厯初洪公其道重修二十年巡撫李公楨督攝篆韓公魏又修四十一年邑令浙泉王公與丞貳馮君敬安又重修明季盡燬

國初督學王公爾祿復建祠於學左不久亦圯壞康熙五

年邑令楊廷蘊同縣丞李成紀共捐貲於魯臺山下
舊基重建共計五進並祀開府公適大中公珣又建
雙鳳亭於山椒周圍植桃柳二千餘株後一株不存
署知縣胡國選捐俸重修工未竟乾隆二年邑令邵
公大業修祠亭柱之木者以石易之知縣沈孟堅增
修乾隆二十五年邑令陳銓勸衆紳士捐金修祠並
以餘金存典生息作書院膏火後被書役等侵蝕殆
盡嘉慶初邑令陳增慶因祠壞勸捐重修道光庚寅
邑令韓維鏞復修

黃陂縣志

卷七

二

三

程明道先生名顥字伯淳生於宋仁宗明道元年壬申
顥舉進士用呂公著薦爲監察御史歷官宗正寺丞
卒於神宗元豐八年年五十四歲文彥博採衆議題
其墓曰明道先生嘉定年謚曰純公淳祐年追封河
南伯元至順年封豫國公全書行於世不具載

程伊川先生名頤字正叔生於宋仁宗明道二年哲宗

初司馬光呂公著共疏其行義召見擢爲崇政殿說
書郎紹聖中削籍竄涪州徽宗卽位徙峽州俄復其
官卒年七十五世稱爲伊川先生嘉定年謚曰正公

清祐年追封伊陽伯元至順年封洛國公全書行於

世不具載

魯臺山

在縣城河東二程夫子築臺望魯於此
係八景之一

雙鳳亭

亭在魯臺山巔嘉慶年間重修道光庚寅邑人劉雲衢捐修後又遭烈風吹倒丁未年邑

令蕭蔭恩集邑人金光杰周超獻周恆渠會議重建增修石楹環植林木頓復舊觀

二程祠

祠在山麓祠內有老紫荆樹一株相傳程夫子遺種明末遭寇焚無存隔三十年忽於土

中萌生復成大樹同治丙寅被兵勇燒燬隔四五年又於土中萌出甚茂

聰明池

池在祠內相傳蛙不鳴蚊不鼓旱不涸水不溢後掘土得一石龜上有八卦或竊之去遂不驗

黃陂縣志

卷七

二程志

四

涵虛亭

亭在池中後廢復修

理趣林

在祠前半里許

程鄉坊

在縣城內縣治西偏

流矢湖

在魯臺山東里許

西郊橋

在縣西城外二里許今稱程夫子橋

前川

在祠前即今縣河許纘曾東還紀程云由黃陂出大南門行距城百餘步為二程先生祠明道

伊川兩先生實生於此祠前濠水曰前川即傍花隨柳處也按纘會字鶴沙雲間人國初出使雲南

按二程夫子本籍河南大中公尉陂時生於是邑

治西偏程鄉坊其故址也暑月無蚊至今異之長讀
書輒嚮往孔子乃築臺山椒遙望東魯故山名魯臺
臺之東有流矢湖相傳二夫子習射曾流矢於此臺
下有聰明池涵虛亭二夫子鑿潭喻道因亭其上池
前數武爲前川卽傍花隨柳處臺西南有理趣林蓋
當年植栢爲林舊蹟外若白雲洞西郊橋澗水臺皆
爲二夫子遊衍處後還洛陂人景懷不置遂建雙鳳
亭於山巔立耑祠於山麓以歲俎豆嗚呼此陂之得
有二夫子而祠之所由來也

黃陂縣志

卷七

二程志

五

春日偶題

程顥

雲淡風輕近午天傍花隨柳過前川時人不識予心
樂將謂偷閒學少年

按此章實在陂邑作故補載之

記

二程祠記

朱熹

齊安在江淮間最爲窮僻而國朝以來名卿大夫多
寄居之如王翰林韓忠獻公蘇文忠公邦人至今樂
稱而於蘇氏尤致詳焉至於河南兩程夫子則亦生
於是邦而未有能道之者蓋王公之文章韓公之勲

業皆已震耀於一時而其議論氣節卓犖奇偉尤足以驚世俗之耳目則又莫若蘇公之盛也若程夫子則其事業湮鬱既不足以表於當年文詞平淡又不足以誇於後世獨其道學之妙有不可誣者而又非知德者莫能知之此其遺跡所以不能無顯晦之殊亦其理勢之宜然也蓋天聖中洛人大中大夫程珦初仕爲黃陂尉秩滿不能去而遂家焉實以明道元年壬申生子曰顥字伯濟又明年癸酉生子曰頤字正叔其後十有餘年當慶厯丙戌丁亥之間攝貳南

安乃得獄椽舂陵周公愔願而與之遊於是二子因受學焉而慨然始有求道之志既乃得夫孔孟以來不傳之緒於遺經遂以其所學爲諸儒倡則今之所謂明道先生伊川先生是也先生之學以大學中庸論語孟子爲標準而達於六經使人讀書窮理以誠其意正其心自家而國以達於天下其道坦而明其說簡而通其行端而實蓋將有以振百世之沉迷而納之聖賢之域其視一時之詞章事業議論氣節所係孰爲輕重所施孰爲長短當有能辯之者而世非

徒不之好也甚者乃目爲道學之邪氣而必翦滅之於是時也苟無遭其伐木削迹焉斯已幸矣尙何望其餘哉今太守李侯乃能原念本始追誦遺烈立二夫子之祠於學宮以風勵而作興之非其自信之篤而不以世之趨舍動其心其孰能與於此李侯名說字誠之其爲此邦勤事愛民固多可紀特於此舉尤足以見其操行之不凡而非衆人之所及是以因其請記而具論之以告來者使有考焉

二程祠記

劉觀進士吉水人

兩程夫子祠巋然於此人所傳者臺曰望魯亭曰雙鳳池曰聰明然先朝碑碣厯世變故靡有復存故往往謁拜庭下者多莫詳夫子何爲如此觀因假息祠側彌久進瞻睥容退懷懿德間乃竊考於朱子嘗言大中公天聖中初任此黃陂尉秩滿不能去而遂家焉實以明道元年壬申生子曰顥又以明年癸酉生子曰頤後十有餘年當慶厯丙戌丁亥之間復貳南安乃得獄椽周公某而與之遊於是二子因受學焉而慨然有求道之心得孔孟不傳之緒於遺經以其

學爲諸儒倡繇此始究知夫子實生於斯也此者二三子歸而謀諸父兄師長欲壽是言於石以昭示夫來學俾以考德之不難也觀因是之故復舉子朱子恆言明道伊川先生之學以大學語孟中庸爲標指而達於六經使人讀書窮理以誠其意正其心修其身而自家而國以及於天下其道坦而明其說簡而通其行端而實蓋將有以振百世之沉迷而納之聖賢之域噫斯言也足以表乎兩夫子之學之道之德業正大光明如日月皎然當與天壤俱矣試讀而能

心得之不惟足以慰二三子資父兄師長勒石之勤劬併足以答方來源源謁拜者聞風覲德之惓切云

二程書院記

提學陳鳳梧

廬陵人

宋興百有餘年文治休明於是河洛之間真儒出焉以續千載不傳之緒二程夫子是已先儒謂明道如顏子伊川如孟子夫顏孟亞聖也生不同時出不同地千載而下景仰之者如景星鳳凰有不可得見之嘆况兩夫子出於一門其時同其地同其道德同豈非天地氣化之盛積累而至於是有不偶然者耶考

之明道始生之年爲壬申實仁宗改年號曰明道若
相符契者次年癸酉伊川生焉天啟斯文之意蓋昭
昭可見矣程氏世家伊洛自大中公少侍其父適令
黃陂及適卒大中公始冠苦族眾無產遂家焉旣而
補黃陂尉秩滿不能調閒居安貧二程夫子實以是
而相繼生其地則今日之程鄉坊是也古今聖賢之
生不必自其鄉者有矣宣聖曲阜人也而生於昌平
之陬邑文公新安人也而生於延平之尤溪蓋皆以
其先世宦寓而言與程夫子實同一揆天地清淑之

黃陂縣志

卷七

二程志

九

氣無往不在則亦無往不鍾豈拘拘於是哉宋淳熙
間李誠之知黃州嘗祠二程於學宮文公先生實爲
之記而黃陂之祠久未有能立者至我朝景泰間同
知蔡綬始卽其地而建祠焉天順癸未僉事沈靖復
建雙鳳亭成化己丑知縣李恆改舊祠爲享堂鼎建
新祠於前高廣倍之繚以周垣樹以松柏而規模稍
稱壬寅左布政使鄭時因師生請乃定著春秋祀典
復檄邑建戟門及左右廊宏治辛酉推官羅翰重建
大門及修補敝陋制益備邑士子知所嚮慕者往往

講肄於其中鳳梧不肖以乙丑奉明詔來典學事行部至邑祇謁祠下瞻慕者久之正德戊辰年得再謁焉顧惟是祠實二程倡道之所始而後人亦借重以爲藏修之地遂易扁曰二程書院得前副使今同知黃州謝君朝宣大書揭之與濂溪南嶽嶽麓石鼓諸書院並稱而祠祀如故擇士之有志者俾讀二夫子之遺書籍得官田五頃五十七畝三分歲取其入以充修葺教養之費其左廊曰坐春右廊曰立雪則今知縣陳傑所重構而教諭楊樑所取名者也楊樑間

黃陂縣志

卷七

二程志

十

率訓導曹軒及諸生來請曰自有祠以來漫無文字可考今改爲書院而記尙可缺乎鳳梧則以二夫子道德之遠且大者文公記之已詳而亦立之石矣不肖復何言惟書院修改之顛末則不可以不之記也遂爲書若夫望魯臺聰明池雙鳳亭及諸故跡則志已具載茲不敢復贅云

謁二程祠記

給事中戚

賢

全椒人

予正德辛未冬入鄉校時夢遊萬松嶺瞻道院一所扁題程大中書院因進謁大中塑其上二程立兩旁

有二藍袍童子引拜拜畢詣祠後見米倉數廩一
二童子攜鑰匙一握付余囑語甚長覺而志之每憶
須至河南可證也昨得荊州藩府封事道人黃陂夢
偶入念及縣投郭訪古賢跡吏人手指河邊坊曰關
里坊此程大中尉我邑時侯夫人夜夢雙鳳投懷遂
生二程於此地嶺上卽書院肖像祀焉予乃大感不
暇就館因先進謁進觀雙鳳亭謁畢循兩廊適鄭生
鸞子偉俊倍聚業出見進庭庭人呼取鑰匙開後門
請登望魯臺臺蓋二程夫子所築以望東魯者也意

蓋淵矣松柏環嶺宛如夢中嗟夫二程何人也一夢
二十三年偶經此地相應何謂也耶因口占一記云
二十三年夢天定到於今悠悠憶洛水靡念及湘溥
偶捧荆藩節假道黃陂陰肩輿戾河干闕里關其心
訊之二程祠古跡埋雲岑下輿進祠謁瞻依注所欽
雙鳳輝宮庭風月洒胸襟須臾鄭生出藍衫曳松林
我言未與竟我情甯自禁導引後庭去呼鑰感尤深
庭制匪倉厥付囑重南金爰登望魯臺瞻眺倍沉吟
憶昔二賢築仲尼顏子尋於今幾百年誰還嗣好音

誰唱春風曲誰鼓夜雪琴愧我半生過蹉跎落風塵
長途醒宿夢搔首懷朋簪

二程祠記

王霽邑人

宋兩程夫子祠舊在魯臺山西泚我皇明因之宏建
廟宇崇風化也祠西南一里許名理趣林古木喬翠
有舞雩風景世傳二先生傍花隨柳處自嘉靖初年
修葺迄今四紀墻圯棟橈將鞠爲莠墟而理趣林地
爲民侵隱闢爲蔬園鄉人咸惜之隆慶肇元簡賢綏
民我邑大夫蘇侯以大司諫來令是邦興廢補敝百

度維新是年春仲穀旦禮祀於祠目覩傾仆嘆曰此
有司之過也遂置謀厥心經始計費多方措貲庀材
鳩工不勞民力拓而新之又謀於余曰二程夫子之
誕於黃發祥遡源當祀其先公如鄒魯崇祀之典况
大中始尉是邑厚德美政畱恩百世篤生賢哲鍾靈
有自乃今崇祀二夫子於祠而泚祠大中於名宦無
乃不可也於是特建一堂於殿後接以過庭以相通
焉名曰啟賢以祀大中大夫計正祠一啟賢祠一講
堂一廡楹各十門二重甍垣環峙歷夏徂秋踰兩季

而工萃地完隘闢不獨廟貌之巍煥改觀而理趣林
之故地咸復舊疆計周圍一百七十八丈五尺黃之
人士奔走欣嘆翕然咸起道學之念則是舉之有益
於名教誠大矣哉邑庠師友胥來請記嗚呼二程之
學天下之正學也海外異類猶知敬慕况其鄉之人
乎凡業儒者皆知遵向况其土之官乎夫鄉人之景
慕也其情同有司之崇尚也其心同宜乎祠之恆新
也二夫子之沒今且五百年矣而祠之興廢不一豈
夫子之道有時或窮斯民秉彝好德之心容有時而

或泯哉蓋亦存乎人焉爾慕其名而崇之者僞也祠
之所以廢也有其實而崇之者誠也祠之所以興也
今邑大夫蘇侯實啟正學在家庭則純孝友任諫垣
則進讜論爲邑令則清慎愛人厯厯可紀其崇奉先
賢非崇其名也信之篤而師其實也是祠之興豈偶
然哉將俾黃之諸士莫不感發砥礪撤利欲之藪探
道德之源望闕里而修實行出躋聖朝贊揚休烈覃
及黃民亦知自新存誠敬以養其性則魯山之陽濞
水之濱彬彬如河洛矣是則蘇侯之所以望於是邦

者敢不勗諸蘇侯名景和字元淑蜀世家也并識之以永聞焉

重修二程祠記

湖廣 巡撫 李 禎

楚爲周南南地二岳兩瀆神泉氣凝神漢澤注孕毓於人宜出命世乃二先生產黃陂邑近符春陵遠禪孟氏墳唱箎和截海連螯難弟者兄穉兄者弟內不私胞言大而當楚之文獻視二先生二先生實宇宙二人楚不得有何有於陂蓋其考珣尉陂時生二先生攷史不著生地地有祠在魯臺山下卽二先生讀

黃陂縣志

卷七

二程志

十四

書處深宵秀茂庭木大者合二人抱望魯者志在東魯見於自題先生復有花柳前川之句故其流清冷而互環者曰前川亭起山椒顏曰雙鳳亦惟二先生名冠裳俎豆自昔不缺若俚俗非鬼神驚禍福人不食其土乃耄俛香燈伏臘輳集森然髮指悔禍內竦其亦燕摩風教若所謂畏壘之攸然耶祠久頽鏹棟宇門屏僅堪枝柱芴榛傾圯鴿雀啜吭棋碁狸穴鷓飛周堵欖桷羣嬉者直逼神衣俾鬼才俊士無極瓌瑋之觀動景行之想甚非闡正學啟遐詔來有資弗

乘後費更鉅予撫楚事竣報命民既戢止百務稍簡
二先生之教業已神遊矧茲睽僅跬武缺焉不得致
虔懃然冲冲已命所司代薦茅邑更出俸錫節縮爰
圖繕制雲而楣文而櫬鏤而檻聖而亭望之坻嶠鱗
胸櫺栴曄曄昂者屹屹垂者鬱鬱直者律律橫者翼
翼茫蒼哉目擊而道存矣享斯燕斯用示崇嚮予茲
惕焉惕者何世無真儒斯無善治無善治斯無民物
生孟氏後秦漢儒者替而經術亢而節義燁而文華
背儒罄泚近今士於是數者曰又漓又蕪甚每詆呵

贅疵吾道楊泣歧可南北墨悲絲可黑黃吾道之泣
吾道之悲獨南北黑黃哉蠶食桑老績爲繭繭化爲
蛾蛾有兩翼不類蟬形蟬化復育復育轉化爲蟬
蟬有兩翼不類螻蟴慾壑橫流靈明窒塞無壘防邪
曷有底止亦有芟夫支離口耳或鶩高遠再墜元虛
不足衛道反授人指古爲道易今爲道難無文猶興
是在豪傑矣二先生道闡六經闢百家行置模言呈
範天下學士大夫出其門者挹其委飲其和曉然孟
氏爲的而直達孔氏身教南人今楚人士無復荆蠻

鄙陋凡陟其巔人其室恍視瑞日之容而領巖巖之
旨安知二先生不靜觀流憩其間冥冥湛湛不尙爲
道憂不尙爲民憂夫君子於道不必癖其有名而實
踐不可無心意其輿正誠其御志其鞭策聖域爲家
予不敏不知可踐二先生支垤餘波否固已不欲瞠
乎後矣先生嘗謂士君子存心愛物於物有濟予於
楚畢命保釐責匪細小黔亦珍青曾否帖席望轉迷
惑顧予嗅咻劑調絲髮不漏茹茶齋粟寢食不暇二
先生其鑒予於幽凡我吏民亦惟著龜二先生保有

黃陂縣志

卷七

記

六

靈明貞度履坦弗納於邪微光休而作之氣斯二先
生享而尸祝昔魯哀公之誅孔子而生不用道見諸
端木氏今予於二先生可重爲魯哀公乎故不得不
爲之綜理也工肇萬曆二十年十月十六日十一月
初十日落成計鏹金若干知縣 武昌推官韓環攝
陂邑都司經歷趙子儀實董其役祠成乞文鐫石因
記其事昭示後來用垂不朽

請祀開府公議略

潘子民 邑人

子民爲庠諸生時但知二程夫子尊公珣曾尉吾邑

秩滿不能去遂家焉時於開府公適尙爲失考餘更
無論及授河南府新安縣儒學訓導備查府志得知
二程故里因悉程公珦祖羽係中山博野人宋太宗
太平興國五年爲文明殿學士贈太子少師以官貴
賜第京師後爲河南人羽生希振爲宋虞部員外郎
希振生適爲黃州府黃陂令清謹卒於官贈開府儀
同三司吏部尙書加贈司空遺珦不能還寓居於陂
遂生顥頤二子未幾錄用功臣嗣就注珦爲黃陂尉
後封大中大夫始知適先爲黃陂令珦後爲黃陂尉

云迺適官黃陂旣以清謹著稱又復教子爲名宦生
孫爲大儒後世罕有嗣徽於適者矣陂無專祠良爲
缺典本縣止憑草誌傳寫但知珦爲陂尉不知適爲
陂令故但祀珦失祀適是敬子而慢父其謂之何適
令有知必謂陂民之薄是珦又不能晏然坐享也今
議進開府公入名宦祠崇正祀題其主曰宋司空黃
陂令程公神位列大中公爲配享則父子咸適俎豆
有光不惟陂人追崇先哲之意得伸而二程夫子尊
祖之心亦少慰矣

按此昔已令祀開府公於名宦祠矣二程祠內止祀大中今於祠後復建寢室并祀開府大中二公與潘先生百十年前初意不謀而合在二程思嗜之忱既堪重慰卽通邑甘棠瞻仰頗亦憑依有地所云一舉而三善備者非歟

重修兩程祠碑原記

張大猷邑人

余邑故有兩程祠祠有宋明道伊川兩先生也祠何以以兩先生爲道學宗也陂何以祠以陂爲兩先生懸弧地也重道學重其所自生也蓋三代而上無道

黃陂縣志

卷七

記

六

學之名有其實自宓犧開天立極神聖遞衍直至春秋閭闔闐闐婦人女子法言法行爛然足述故曰大道之行也天下爲公又曰君子學道則愛人小人學道則易使也仲尼夢姬旦志大道之行不得遇而刪述六經陶鑄七十二子仡仡乎憂學之不講蓋曰道之不明由不行也寄行於明悽悽乎深心在後之人耳漢儒遂以經師相承守至宋而道學之傳益尊且廣兩先生其最著者也先生之祖開府公適終於陂大中先生以錄舊臣後不能赴就注陂尉任滿僑居

久侯夫人夢雙鳳而兩先生誕於邑之程鄉坊稍長
築臺望魯因讀書其中今之祠其山麓也遠祠一水
其傍隨前川也大中後別遷還洛爲河南程氏不知
陂實先生之尼山嶽嶽也魯山其杏壇闕里也前川
其洙泗伊洛也故祀典列於學宮秩於春秋所從來
舊矣乘軒君子每過而謁焉特崇其廟貌而稱殷禮
肅肅宮墻如馮如式年來水伯爲泮垣墉堂廡圯存
相半邑侯浙泉王公愀然動色當公車計冗之時割
期年俸薪委清戎敬安馮君葺而新之侯德性醅美

誠學問中人蓋生白沙先生之鄉與復所太史櫛比
而薰染馮君臭味東林行殊越儕偶有儒風不數月
而工遂落成同氣之求固如此也祠自諸先達發軔
其中學者雲集而羅文恭李見羅耿恭簡諸先生低
回過化講學之風日新月盛迨今黃抑美侍御守拙
孝廉以二三同志毅然持牛耳之盟四方之士往往
擔簦負笈而邑中與會者衿紳童冠而外無類不至
無不環橋悚聽而易慮焉毋亦五百年風氣有開必
先伯氏仲氏適符其會乎顧余猶有說焉今天下楚

宇琳宮星碁周布而檀越外護不惜布金以徼福利
緇黃之徒朝至而暮投餐如素持焉何者有其資之
有其主也祠舊屬庠役一人主守自省均賦役議撤
及此遂汜汜如不繫之舟管鑰失司矧能爲四方資
館穀乎此圯廢之所自來也先是署篆趙參軍置田
三十畝以業學徒而董侯潘侯先後置用物若干今
侯復置田三十畝尙餘所捐俸以先諸義助行有成
緒矣惟是田不租官則散而無統而委糜佃役出入
奚稽守不專責則虛而無主而傳舍遽廬啟閉孰事

實爽明德應切遠圖侯之令陂也百度貞矣五氣順
矣物情洽矣明神享矣而嘉與斯文垂之永久以爲
兩先生千百年計尙亦有賴哉馮君風節表俗且欲
舉臺亭而聿新之其相與以有成固亦一時之盛事
余不佞不知學謬與斯會惟鄧君葆之王君溪石王
君德諒周君恒吾輩共立而襄其成諸君子無不有
同心焉繼自今其惟朝斯夕斯期明兩先生之學以
開釋宣聖不行不明之憂毋徒聚口說以負侯及馮
君今日之心庶幾乎實稱其名而於祠有光矣若謂

聖人之道不行於周公之後聖人之學止傳於孟氏之前則先生固有意乎其言之也重道統也敬以蒞之異日主斯盟者萬曆四十一年歲次癸丑七月既望記

重建二程祠記

陳天策宜興人

中丞李公禎之言曰二程夫子實宇宙二人楚不得有何有於陂廣哉言乎然吾念之二夫子不生於陂楚且不有何有於宇宙宇宙得有實始於陂蓋二夫子二世於陂並產於陂者也向也一徘徊於程鄉坊

黃陂縣志

卷七

記

三

再徘徊於望魯臺咨嗟景仰而謀所以祠之者良以陂人士之撫祠以瞻二夫子也與二夫子之撫臺以望魯也無以異絃誦者耕桑者樵牧者負戴往來者罔不環臺追慕而尸祝不啻若舞雩之座泗水之濱良有由矣乃者雙鳳舊址一旦鹿場秦灰重劫以厄二夫子者不已甚乎亟謀鼎復而頻年兵荒復以厄簡翁者厄二夫子以故遲之又久今乃得偕三韓李公捐俸卜吉整規模而棟宇之不數月而一望翬翼前此瓦礫敗地居然花柳舊川且與陂人士歌落成

矣或曰二夫子廟祀徧天下何遽懷此都乎曰祭海
先河古之義也二夫子之在楚與宇宙義猶海也其
在陂義猶河也二程去洛蓋猶夢寐西陵矧陂人士
過閭而慕過墓而哀其於斯祠實甚簡翁方以風化
本根教陂敢忘二夫子式憑故宇令陂民無由瞻仰
乎重建是祠亦魯僖闕宮之義也

登魯臺記

屠

達

南蘭人

事之興廢豈不以人哉予初登魯臺殆亦蓁蕪廢壤
也然牧豎兒童無不知二程夫子者曰此當年望魯

黃陂縣志

卷七

記

三

處也嗚呼二夫子之繫人景慕若此哉因詢諸故老
訪其遺事而知二夫子嘗生於陂嘗於此山築臺以
望魯故名也山巔因臺爲亭名雙鳳山麓有祠祠前
有聰明池涵虛亭其西南里許二夫子嘗植柏爲林
名理趣林迢遡諸勝歷歷如見乃自明末兵火而轉
爲荒草蕩爲寒煙其斷碣殘碑零落山間者且與纍
纍之荒塚相接故宮之嘆不止黍油麥秀也嗟乎古
名賢遺跡凡一流寓一嘯咏以及一草一木後人莫
不愛之傳之惟恐不至况茲山爲二夫子故址其農

夕盱衡百世後魂魄猶應戀此而顧頽廢乃爾雖時
會使然陂之人將何以爲懷歟予流連久之徘徊不
能去乃日者復渡前川遙而矚之忽若鬱然改觀者
爲之驚喜而前則見有翼焉以整者山麓之二夫子
祠也竦焉以峙者山巔之雙鳳亭也泉淙淙風泠泠
悠然以清者山前之聰明池涵虛亭也草薰薰木欣
欣遙映於山之遠近者西南隅之理趣林也又爲之
入祠以謁而見庭之殖殖者二夫子座也冥之曠曠
者啟賢堂之大中公及寢室之司空公座也出祠以

觀而見四周之層以密者百堵之興也一望而綠烟
繚繞者髣髴傍隨之花柳也噫異哉抑何倏然而成
舉數十年之廢圯而一旦復之且有加焉如此哉或
告我曰此邑侯楊公所旦夕以經營者也亦同事李
公所刻期以拮据者也維二公淬志復古捐資以圖
故陂民樂趨成之不日也然則事之興廢豈不以人
哉吾於是知二公之治陂類如此祠矣楊公昆陵人
予鄉世家負夙望李公原籍濟水前任予鄉直指皆
卓有風節者因並識之以爲陂幸又不獨茲山之興

復也

重建二程祠記

聞政晉陵人

二程祠之建於陂也其圯而修葺之也不知凡幾若既廢而重建也則自今日始二夫子得統尼山既從祀廟庭血食天下矣惟陂爲桑梓地祠而祀之尤爲亟亟在宋止祠於郡城陂初猶未及也明景泰間始建祠於魯臺成化間始定春秋俎豆凡當日有志斯道者歲聚諸生以時講習其間文風稱盛乃兵火以來悉歸蕪沒予初過其處惟見河干斷碣字蝕風雨

黃陂縣志

卷七

記

三

瓦礫廢址荒草離離卽山巔鳳亭亦孑然濯濯寒煙繚繞而已嗟乎魯山如故風景淒然鳳鳥不歸白雲空在吾思佛老虛無之教徧天下梵宇琳宮暉映山水者不可勝數獨二夫子理學淵源功在萬世卽四海慕道之士無不家戶而戶祝奈何根本之地願使依棲風露頽廢荒涼若此乎是誠今日之闕事也近者予鄉簡菴楊公與關東李公雅志復古乃剪荆藎尋舊址鼎構新祠且於後建啟賢堂一寢室一並祀其祖若父於山巔復建雙鳳亭環祠前後又植桃柳

千餘株當年名勝一朝盡復爲之登臺一望綠暗前
川人祠再拜音容斯在由是二夫子之靈爽得所式
憑而大中父子亦得依依一室矣不甯惟是卽陂之
人士數十年思慕嘆悼之情俱爲甚慰而後日濟濟
多士亦得絃誦於茲闡明夫子之學將見後先相望
蔚然興起矣謂非西陵盛事乎予因是而深爲簡翁
羨也嘗見世之以官爲傳舍者雖所居若寄何暇及
名賢之遺跡與旣廢之荒祠今翁下車卽首繕城郭
次建縣治次修文廟以迄關帝諸廟至二程祠則重

黃陂縣志

卷七

記

三

爲建置焉一邑廢墜悉爲修舉豈僅爲地方一日官
職一日事者比歟後之令是邑者嗣而葺之魯山祠
宇千載如新則二夫子之幸也夫抑亦簡翁之幸也
夫

重建二程祠記

邑令

楊廷蘊

武進人

世稱二程夫子必云河洛蓋河南程氏自宋以來所
共傳也予家龜山公嘗立雪程門其稱二夫子者最
悉亦未言所生何地初未嘗一語及陂自予承乏是
邑乃知邑有程鄉坊爲二夫子懸弧地因嘆從前稱

二夫子者殊未詳其本末也後登魯臺見一古碣橫
卧山間拂拭視之則爲考亭朱子二程祠碑記蓋知
二夫子嘗讀書此山築臺望魯故名初建祠學宮朱
子記之後復建亭祠於山因以朱子祠記移勒於此
頽而復修者凡幾明末亭祠灰燼惟碑存焉予悵然
久之亟欲修復會兵荒相繼耿耿於中近得同寅李
公淬志復古雅有同心乃相與捐俸庀材卜吉鳩工
度其故址悉爲鼎建於中廳祀二夫子後復建啟賢
堂祀大中公珣又進一室祀司空公適蓋大中公與

黃陂縣志

卷七

記

美

司空公皆曾蒞陂而有造於陂者不可偏廢故并祀
之則視舊祀爲加詳矣於山椒建雙鳳亭前後植桃
柳二千餘株以仿前川傍隨之勝陂民踴躍將事不
日告竣凡曩時臺祠花柳悉復舊觀亦

興朝鼎新之勝事也嗟乎二夫子之還洛也猶曰吾夢
寐恒在西陵是夫子未嘗一日忘陂也夫二夫子不
能一日忘陂而謂陂能一日忘二夫子乎今建祠而
上及大中公與司空公合祖孫父子共祀一堂儼然
當日聚首西陵之况應亦二夫子所甚慰也二夫子

雖廟祀徧天下而陂爲生長之區寤寐往來之地千
百世後猶共仰之則魯臺片席安在不與河洛並傳
祠成因勒石爲記

黃陂縣志

卷七

記

三

祭文

祭明道先生

楊時

元豐八年夏六月既望河南承議先生以疾終於官是月晦邸報至彭城其門人楊某聞知爲位慟哭於寢門而以書訃諸嘗同學者嗚呼道之無傳也久矣孟子没千有餘年更漢歷唐士之名世揚雄氏而止爾雄之自擇所處於義命猶有未盡自雄而下其智足以窺聖人之門牆者蓋不可一二數也况足與語道而傳之哉宋興百年士稍知師古諸子百氏之籍

黃陂縣志

卷七

祭文

天

與佛老荒唐謬悠之書下迨戰國縱橫之論幽人逸士浮夸詭異可喜之文章皆雜出而並傳世之任道者日夜憊精勞思深探博取可謂勤矣然其支離蔓衍不知慎擇而約守之故其用志益勞而去道彌遠使天下學者靡然趨之如適諸夏而棄通衢大道犯荆棘之墟行蒼崖之巔眩然迷殆而卒莫知自返者其於世教何補哉先生於是時乃獨守遺經合內外之道默識而性成之其學淵源蓋智者不能窺而善言者所不能說也自周衰以來天下之學其失如彼

則後之得聖人之道而傳之者於吾先生可非獨任其責哉嗚呼道之傳亦難矣夫由堯舜而來至於湯文孔子率五百有餘歲而後得一人焉孔子沒其徒環天下然獨積百年而後孟子出由孟子而來迄漢唐千有餘歲卒未有一人傳之者若孔孟又皆窮老於衰世其道方不得一施於天下夫聖賢之不世出而時之難值也如此今幸而有其人又且遭時清明朝廷方登崇俊良而先生未及用而死則予之慟哭豈特以師弟子之私恩而已哉故爲辭以泄其哀而

黃陂縣志

卷七

祭文

五

自慰云余悲古人之不見兮逢世德之險微析道眞之純美兮肆全體而分封駕異端而並逐兮駙支轂乎多歧亘千歲其泯泯兮去聖旣遠而卓彼先覺兮惟德是仔展斯文之在茲兮萬世之師鋤蒺棘之荒穢兮闢正路之孔夷代聖賢之軌躅兮背世轍而疾馳帶鈎鉅而負繩兮紛萬變而莫窺馳銜勒而弗厲兮尙周旋其中規嗟命之懸於天兮匪予敢知背溟渤而載華岳兮曾有塵之弗施嘆道之難行兮孔孟窮老以栖栖時勢則然兮此云胡其若茲通闢闔於

一息兮尸者其誰幹天樞而自爾兮欲執咎其焉歸
齊死生於晝夜兮天理之常匪往匪來兮雖壽夭兮
何傷想德音其未遠兮儼若在傍固誠之不可掩兮
何有何入日月逝兮形魂藏嗚呼已矣兮斯亦難忘

又

提學

薛

綱山陰人

惟神道著天下澤溉後世遡本窮源實始茲地大江
毓靈魯山孕異雙鳳齊鳴羣蛙止喙近師元公遠接
孟氏千載之統一門攸係崇祀廟庭萬世公議祠祀
是邦黃人私志公私之舉吾道之寄

黃陵縣志

卷七

祭文

三

又

提學

陳鳳梧

斯文之喪千有餘年既絕復續有啟自天灑河之涯
魯臺之麓維兩夫子神秀所毓倡明正學功在六經
原原本本孔孟是承萬世而下尊曰程鄉有祠一宮
洒掃敢忘典學有年載瞻載仰行部匆匆未陳一奠
用是惶汗曷悔厥愆式俾官屬薦此蘋蘩降神之地
豈不睠茲吾道以南庶其佑之

又

丁汝夔

於維先生肇基中洛呈祥黃邑天啟聰明學歸純正

遵經續傳斯人不振德師百代功被萬世俎豆有儼
永歆無斃歌曰 於昭閔宮皇皇厥風神之來思
陟降於中 於昭閔宮旭日雍雍神之燕思鬱鬯
是供 於昭閔宮日之既東神之旋思萬福攸同

銘

理趣林

張克恭

瞻彼林木灑河之東牛羊不牧斧斤不攻佳氣以呈
鬱鬱葱葱昔有先覺程氏伯仲讀書之堂東西相望
藏修燕息與道翱翔情與景會理與心契萬物靜觀
四時佳致顏氏井亭點也舞雩陋巷春風樂得其趣
後生小子希之則是希之維何誠敬乃至

魯臺

鄭鸞

邑人

瞻彼魯山先哲之跡欲躋伊何維趾斯力瞻彼魯山

黃陂縣志

卷七

銘

三

先哲之巔欲登伊何維心斯嚴爰力乃趾爰嚴乃心
君子既登先哲何人君子既登景物熙明傍花隨柳
雲淡風輕君子于登望彼泰山仰雖彌高維力維嚴

二程祠

邑令

楊廷蘊

粵維西陵誕生二程築臺望魯尼山是承闡明絕學
斯道光明有宋文治賴有弟兄伯也春風仲也嚴冰
當時模範後世干城因時移易祠祀幾更鼎新廟貌
斯文聿興凡我陂人是訓是型

詩

五言古

瞻眺魯臺

李成紀 縣丞

懸弧長濟水哦松吸澗泉偶來東野外因至南河邊
古碣埋芳草荒臺帶晚烟有懷程夫子悵望魯山巔
為剪荒臺棘祠宇復當年碧水環山麓輕風拂午天
公餘偶來此好鳥喚前川

遊魯山有懷

聞政 晉陵人

千里到西陵敬謁兩先生先生不可即俯首獨行行

黃陂縣志

卷七

詩

重

細柳爭晴綠游絲曳午輕燕作撩人舞鶯弄送春聲
遊子未歸去湘雲天外平徘徊魯山上空餘今古情

喜咏紫荆樹

并序

邑令 楊廷蘊

二程祠內舊傳有紫荆樹一株掩映庭除蔚
然茂盛自崇禎間屢經兵火亭祠灰燼而荆
被伐迄今三十年矣根底朽絕化為鹿場近
者新建亭祠而庭前瓦礫中荆忽復發都人
士咸奇之豈斯道與天心復而荆亦更生耶
實為可異因賦此

魯山一紫荆當日茂且榮自從兵火後三十年不萌
程祠今鼎建荆樹又重生西陵老與少相見喜且驚
聞昔田家樹感悟兄弟情而今亦如是誰曰非異徵

七言古

重建二程祠志喜

程遵舜 雲夢人

勝跡昔年遺在此斷碣荒臺餘廢址先公偶作前川
詩歷代相傳誦不止新春過謁獨徘徊風和雲霽埜
煙開楊公李公闢草萊構亭還待雙鳳來棟宇巍峩
輪奐新鶯聲出谷喚遊人種柳再教千載盛植花重
布萬家春河南一脈相延久愧余忝生賢裔後兩公
復古功隆隆當與茲山共不朽

遊魯臺

聞政 晉陵人

黃陂縣志

卷七

詩

五

西陵城外滿溪柳朝曳綠煙迷渡口野店紅桃照眼
明遊人醉唱梨花酒亭邊野老爲予言當年程子過
前川至今地以人增重越都名士共流連只因明末
起流氛四海兵戈逐電走吾陂南北當其衝魯臺兵
火荒蕪八三十年來滿目煙楊侯慷慨捐萬錢河干
灰燼舊祠宇一旦圖成遂煥然余因太息重低徊興
廢由人誠信哉登臺搔首爲一望彷彿雲中雙鳳來

五言律

謁程祠

周 塗

蘭陵人

道氣高今古令人思不窮
明開千里月和拂一簾風
亭鳳歸何處川花在望中
登臺一瞻拜鄙吝自消融

春日間步前川

趙 鏞

澄江人

迤邐到前川遊人爭渡喧
花明沽酒市柳暗釣魚船
好鳥啼深樹輕風拂翠煙
眷言程夫子翹首夕陽天

謁程祠

聞 政

晉陵人

西陵蕞爾地雙鳳並鍾靈
理學昭雲漢詩書炳日星

黃陂縣志

卷七

詩

五

千秋人已遠兩岸柳猶青
展拜空庭下苔花繡綠銘

魯臺間眺

張世祐

邑人

搔首獨登臺晴光四面開
雲移山徑轉風送水聲來
柳幃籠烟市花陰拂翠苔
間尋孔顏樂莫作戲遊猜

謁程祠

張御楷

武進人

西陵古南國自有二程傳
土以人增厚川因德愈淵
升堂羞後學入室慕前賢
莫謂先生遠高風尚儼然

七言律

謁程祠

僉事

張勉學

長洲人

二程祠畔松十圍祠下流泉接魯沂滿目雲山空縹緲前川花柳自芳菲臺高盼望清風遠塢曲藏春白日暉趣駕欲行還伫立澗蘋溪藻自依依

又

陳鳳梧

河水悠悠遶縣旁至今人說二程鄉靈鍾伊洛雙川秀道續濂溪一派長花萼祠堂聯貌像蘋蘩俎豆薦馨香門前欲立慚無及春雪方深望魯岡

黃陂縣志

卷七

詩

美

又

方伯

孫光祖

慈溪人

西陵雙鳳集梧桐百舌桃園識羽宗今歷魯亭觀海岱猶憐蹊路失西東伊川嚴毅庭前雪明道從容座上風不有曉聲驚夢覺許多誤聽五更鐘

又

祝世祿

邑博

共傳河洛兩夫子弧矢卻懸江漢墟花柳陸離春風外門墻蕭清夜雪初有臺望魯魯在望狂歌招鳳凰不居風簷低徊忽千古寒林閣閣空遺書

登魯臺

王大可

郡倅

雙鳳亭高暑頓忘清風已到二程鄉煩襟滌盡伊川
水引領還登伯子岡五百年來英爽在三千里外派
源長濂溪彷彿門牆下河洛依稀洙泗旁

登魯臺晚眺懷人

祝世祿

荒城斜日帶江皋木葉蕭蕭捲素濤人自壺中窺混
沌客從酒半把離騷提封萬里猶秦塞大雅千年入
漢畿回首孤臺雙鳳去風雲蒼莽泰山高

謁程祠

王可大

二程祠宇枕江流祠外松杉黯楚邱雲裏老龍東井

黃陂縣志

卷七

詩

七

會人間雛鳳魯臺畱石渠白虎空糟粕天祿河汾總
贅旒百代冠裳瞻氣象宮牆祠祀肅千秋

又

殷自仁

德安人

單夾初成遊故里大儒遺勝此朝尊風雲輕淡天將
午花柳傍隨春欲深臺築早懸東魯眼經傳只見伏
羲心年來愧我浮名絆再拜堂前汗不禁

又

朱天啟

邑博

鄒魯相承濬道源千年伊洛續眞傳春風滿座薰多
士寒雪盈門凜二賢邪說廓清雲捲岫大經昭示日

中天拜瞻第恨予生晚志切儀型身未前

理趣林

陳壽 邑人

平林騁望鬱芊芊塔影孤懸挂日邊近堞樓臺千樹
翠遶村水漲一湖天晚舟漁唱鋪星火早遂牛歌跨
夕煙縱有市塵渾不入陶潛心遠地為偏

登魯臺山

時未建亭祠未栽花柳

聞政 晉陵人

拂袖穿橋到魯臺鳳歸丹穴不重來舊祠蕪沒連衰
草斷碣漸靡卧冷苔曲水高流山下去殘鴉還傍日
邊回前川不復當年柳一帶晴煙向午開

黃陂縣志

卷七

詩

五

步韻弔魯臺

張恕楨

溇澤人

魯臺湮沒已多年寂寂虛亭委夕川古鼎無灰吹石
火荒邱有塚續新傳自來自去池邊鳥時滅時明水
際煙弔古臨流神往矣斯文興起仰名賢

魯臺山

陳天策

三十年前偶過都高山長水我師乎文章大塊柳花
舊賢聖為徒兄弟俱阿閣再新丹鳳穴禹書重篆洛
龜圖楚臺彷彿如東魯遙望將來又入吳

登魯臺

屠達

南蘭人

浪跡西陵過魯臺
午天輕淡重徘徊
幾多煙柳迷花塢
欲盡春光付酒杯
高鳥看從天際沒
小桃應傍故園開
生平徒有登臨興
誰解尼山人望來

謁程祠

屠達

孔顏樂處復何尋
淡淡春光理趣林
望魯蒼茫連海岱
前川浩渺接江潯
孤亭聳立畱殘碣
雙鳳長歸斷好音
爲仰先生遺範在
肅然瞻拜整衣襟

題二程祠

邑令楊廷蘊武進人

承乏西陵已四年
時懷雙鳳到前川
斯文久賴先生

黃陂縣志

卷七

詩

堯

在大道全憑夫子傳
往日亭臺埋宿草
新春花柳曳輕烟
高山在望堪千古
樂與陂人仰大賢

邑侯楊公新建二程祠過謁喜題

教諭

邵光祿彝陵人

我膺初服披名跡
吾道宗盟拜二程
派衍中山雲氣合
碑畱殘篆草痕菁
編成一字千秋碧
鳳吐雙丹萬里聲
幸賴眞儒相接引
楚黃名教有干城

喜建二程祠

余以辛丑分疆茲土時過魯臺見亭祠灰燼輒興修建之思奈力薄未果近楊李二公共圖鼎復不日落成余憾未及身任是役然於區區復古之初心有相

合者因附和
一律以志勝

訓導

夏啟昇

鍾祥人

西陵駐足數經年步向荒郊指洛川
恢復寒氊空首
菑圖新良牧繼薪傳涵虛池畔凝秋水
望魯峰頭集
暮煙四座奎樓雙鳳舞清輝遙映古堂賢

謁二程祠

戴元韶

宜興人

少懷立雪在程門山水鍾祥此一村
千古同堂鄒魯
席一生望道弟兄存春風花柳明如錦
劫火樓臺勢
更尊三楚衣冠思俎豆何須西竺乞靈根

余過西陵登魯臺山見鼎建二程夫子祠深服

黃陂縣志

卷七

詩

罕

簡翁楊公有大功於先哲因喜賦此

沈

濬

平陵人

碧水漣漪遶魯臺香消古鼎久蒿萊
天悲往哲延秦
火人起斯文庇楚材鳳翥丹邱川
映月檜同尼阜露
滋枚登臨仰見雲生棟咸頌關西夫子來

步前川

向

古

邑人

五百年來宋兩程前川從此有專名
間時花鳥迎人
笑悟後風雲過眼輕徒不斯人誰可與責
非吾道詎
關情蒼苔剝蝕殘碑字讀罷遺編山鬼驚

七言絕句

登魯臺

張學勉

荒臺百尺江之濶為想當年望魯心見說尼山遙在望片雲無奈隔遙岑

涵虛亭

貢端宣城人

半畝方塘一箇亭森森萬象入虛明百年心印今猶古怪得蚊蛙不敢鳴

步魯臺

楊廷蘊

細雨方過柳色新前川堪擬武陵津春風煦煦吹人

黃陂縣志

卷七

詩

望

面恍與先生函丈親

遊前川

聞政晉陵人

昔日離離芳草煙而今花柳復依然遊人載酒程祠外席地猜闔醉午天

余素知二程夫子生於河洛不知其產於楚也

近過西陵乃為夫子懸弧地進謁其祠而始

悔向者之誤也因作此

邱起龍武進人

共道河南有二程誰知夫子產西陵從今獲拜春風座半世邯鄲夢始醒

四言

登魯岡

丁汝夔

陟彼河梁以望魯岡夫子之牆有耿其光

雙鳳亭

陟彼南山鳳鳴於巔伯兮仲兮吹箎吹壎

理趣林

蔚兮林兮隣于魯臺君子戾止維以永懷

聰明池

有池漫漫在河之畔君子蒞止我心如湛

黃陂縣志

卷七

詩

望

望魯書院紫荊花歌 書院階前紫荊一株相

傳程子手植明末遭流賊所伐隔三十年於瓦

礫中復生邑令楊簡菴有詩記之載在志中同

治乙丑又為官兵所焚根株無存至庚午年復

生邑人皆以為奇也因作長歌一首以為吾邑

讀書者慶

徐瀛

孔門弟子治任歸林邊樹木尙芳菲七十之徒各手
種至今模楷俱十圍千四百年有程子魯臺望道自
公始庭前偶植紫荆花輪困勃茂茂與比誰知明末
騁流氛玉石崑岡總不分衣冠俎豆變塵土此樹亦
遭秦火焚三十年來埋蔓草蔓草荒煙天地老關西
夫子立空階欲噓鄒律回枯槁豈意靈木有靈根瓦
礫堆中忽孳蕃不憾舊時翦伐慘同爨

聖朝

雨露恩是時正修吾邑志楊侯有詩紀其異轉瞬二
百餘年來不見繁枝見平地前川花柳一片焦日光

黃陂縣志

卷七

詩

聖

黯黯風蕭蕭賊害一二兵八九大將姑息士卒驕噓
枯回生賢宰至先修邑城次古寺六載燼餘又萌生
野老傳聞稱奇瑞凡事興廢有夙緣樹木偏得氣之
先是否神物相呵護令人摩挲想昔賢憶我髫年來
此地講學課文月一試有時看花秉燭遊二三良朋
共沈醉從此年年享

昇平

遙山枯木盡發榮舊德書香傳士類先疇樂歲慰編
氓兩度劫火竟重殖那畏風霜相剝蝕薇省趨直盼
花開寄語芸窗齊努力

祭田

祭田

坐落大西門外興隆寺傍

按祭田久廢幾無可清但舊志云計田叁石零共陸拾畝一爲萬厯間署篆趙參軍置一爲丞貳馮敬安置今仍其畝數坐落識之以俟後之君子有志復古照冊清出庶還舊觀亦羊存則禮存之意云爾

跋

二程志跋

楊廷蘊

千百世後咸稱二程夫子產於河南而不知區區一
陂迺二夫子曲阜孔氏之陬邑新安朱子之延平也
邇開闢來之日星道統者惟孔孟其人焉秦漢來之
淵源聖傳者惟周程張朱諸子焉宇宙至大古今無
窮聖賢曾不能多兩夫子顧儼然以伯仲並列崇祀
豈非生民以來之再盛吾陂以來之獨盛歟二夫子
道學文章其言其行備傳於世茲不錄卽雙鳳投懷

黃陂縣志

卷七

跋

畢

之瑞近開伊洛遠接洙泗考亭詳記之亦弗贅諸若
監察說書俱未足爲引重并不載惟官秩爲二夫子
祖禰本源選舉亦二夫子君父恩寵故先各敘於前
以爲特志張本因校正數百年相沿之舊取原志所
分載者總彙一冊蓋麟鳳山海生而出類固無得而
等夷正非特書者所能表章矣

黃陂縣志卷之七

下

木蘭志

敵愾禦侮從事疆場雖六尺鬚眉猶且難之况求之巾
幘中哉若唐木蘭生於黃陂以女子代父從征立功異
域上賞不受復歸故里烈性奇勳流傳千古謂之忠可
也謂之孝可也豈但神異之蹟傳播人間者爲足重哉
輯木蘭志

木蘭將軍舊志列諸貞女以冠節孝之首可謂知所
重矣然於尊崇之意猶覺歉然今取舊志所載及各

黃陂縣志

卷七

木蘭志

文集所列者彙爲一編以見千古特出不與尋常等
夷云

按木蘭係縣北朱氏女生初唐父隸兵籍年老不堪
從軍假男子裝代父從征十二年乃還終身未適其
略見古樂府并杜牧之劉後村詩其塚在木蘭山下
祠在山巔其坊題曰忠孝勇烈

題建木蘭山將軍廟奏疏

遼東巡撫都察院右副僉都御史兼管倭備臣張濤爲
啟建祠宇以光山岳事竊以名山大川聖朝隆封祠之

典靈壇古社羣黎修烝嘗之儀有湖廣省黃州府黃陂縣木蘭山乃真武修鍊之所唐節度使朱異家於其下其女代父出征功封木蘭將軍啟建祠宇於其上並立真武廟貌世遠年湮香火頽廢臣叨生茲土感將軍之貞烈沐真武之威靈意欲捐貲未敢擅便伏乞陛下念真武功在國本將軍勳立唐朝臣得以重修鼎建一以動神人護國之念一以啟士民忠孝之心臣誠惶誠恐謹奏 萬曆三十七年張公清奉勅重建

木蘭古傳

失名

黃陂縣志

卷七

木蘭志

二

木蘭將軍黃郡西陵人也姓朱父壽甫母趙氏無子禱於建明山趙氏夢山神抱一女入室曰此將星也三國末墜諸葛營中自土字分裂三辰失形久隱此山今付汝家黃有四澤澤氣多女故不能男後二十年當顯於世遂有娠如期生女是為木蘭壽甫長男全思歿於軍少男孺生尚幼木蘭兒時狀貌端凝不雅修飾心志貞純孝友忒聰穎詩書過目成誦悲歌慷慨有烈士風每對鏡流涕恥為女相讀書至母儀婦道及忠孝大義處輒太息不自安會哭厥入寇軍書疊至壽甫以千戶長

應赴選苦衰羸不堪遠征日夕憂戚木蘭方織紵投杼
歎曰緩急無所恃生女何爲乎迺市鞍馬易戎服爲男
子妝代父北征自號貞烈壯士易名朱貞烈木蘭之至
軍也詭離韜晦正氣凜然一時從征之士舉莫敢覬視
嘗乘輕騎與其屬將偵虜虛實人無有知者木蘭旣悉
虜情凡軍中策應機宜必咨及焉貞觀三年詔大將軍
李靖率諸營進攻突厥持久不下卒疲無鬪志木蘭進
曰元帥擁十萬之衆轉芻千里之外若其坐甲不前一
旦糧匱能保敵人不乘隙至乎願假數千人誓掃鯨鯢

黃陂縣志

卷七

木蘭志

三

以報朝廷元帥壯其言選健卒五千與之隨督大軍分
道並進木蘭深入虜地轉戰數晝夜瀕死賊中五千人
幾盡屬將張萬坪張德官木之易李之材童侍恩黃衣
郭東如此七人者皆忠義之士相與振臂一呼醜虜喪
膽木蘭遂乘勢拔其堅壘時大軍已抄襲虜後聞木蘭
捷報奮力併攻合圍突厥於陰山遂大破其衆還朝策
勳除木蘭尙書木蘭辭曰臣在邊十二年父母存亡未
卜願乞歸省上嘉其孝賜內廐千里馬使馳以歸木蘭
卸戎服理舊妝自是承歡膝下孝敬弗衰壽九十以疾

終於家塚在木蘭山後上一塚卽將軍墓下一塚乃葬衣冠處舊有碑碣漸爲牧豎所殘云

孝烈將軍傳

康熙乙丑傳
臚官侍講

張希良

石虹
黃安人

將軍名木蘭逸其姓或曰魏氏女也其事不見正史故里居世代言人人殊按保定志將軍亳州人其父故隸伍籍調戍於完完古曲逆侯國也後爲縣將軍父因家焉漢孝文時老上單于入寇天子大發兵禦之將軍父且老又無長男當行乃僞爲男子裝代父從征轉戰黑山十二年斬捕首鹵有功當上賞不受乞歸省其父母

黃陂縣志

卷七

木蘭志

四

於完父母尙無恙乃釋韎鞞重整妝臺施朱粉蛾眉宛然曩與從事戎行者見之大驚轉相駭歎始知將軍女郎也唐人高其孝烈錫今稱樂府有木蘭辭二章志謂將軍作非後追擬之耳按今商邱古亳地城外有孝烈將軍祠焉亳人無疑然借山隨筆將軍墓在完縣學宮蓮沼中其土不可取取之殷然如血而郡志不收何耶張子曰予所居之西五十里蓋有木蘭山云山爲陂邑北鄉高千仞諸峰羅列山有將軍祠下有墓明初盜嘗竊發其墓風雷衛止靈應與在完沼者無異山中孺嫗

往往譚將軍逸事而山北復有唐木蘭廢縣縣以山名
耶山以將軍名耶陂志則以爲邑人矣將軍之英如水
行地無所不之若所稱漢文時誠曹曹焉小杜之咏將
軍曰彎弓征戰作男兒夢裏曾經與畫眉幾度思歸還
把酒拂雲堆上祝明妃明妃入胡在漢竟甯世去孝文
一百五十載將軍征戰時豈能豫祝耶牧之晚唐人距
將軍宜不遠不應使事如此之誤予按其辭確證爲唐
人所作者四古樂府不拘韻辭中韻凡數換悉按沈約
四聲證一唐以前天子無稱可汗者太宗時諸番來朝

乃奉上大可汗之號故葉護謂郭令公曰聞天可汗云
云證二古本云願借明駝千里足送兒還故鄉唐驛置
明駝使非邊警不得發而貴妃私發之以荔枝遺祿山
證三辭曰出門看火伴唐府兵之制十人爲火證四不
必朔氣傳金析寒光照鐵衣定爲唐人句矣古人作卽
追摹往蹟必切其本事時制不如近人名稱但取都雅
沿曩代而失當時之實也然則可汗唐稱也卽將軍唐
人矣予觀自古女子未有如將軍之奇者也緹縈曹娥
輩至性激於一往易耳身經百戰糜處儕伍之中曾不

知其雌雄此其智勇有過人者功成而不有居然大樹
風哉明初又有韓氏女當元末兵起卽詭丈夫服溷跡
民間已爲明玉珍兵所掠處軍中二十年莫知其女子
者南詔平其季父遇之以歸嫁爲士人婦與將軍絕相
類故牽連書之而岐志又言將軍朱氏女開府張山是
先生有木蘭歌一篇歌卽嬉鴨湖木蘭歌足繼古樂府牧之後村
不得而倫也若謠俗所傳剖腹明貞語不經亦無取焉

木蘭將軍傳

王 霽

木蘭將軍大唐初黃人也黃西陵治北六十里許名山

黃陵縣志

卷七

木蘭志

六

曰木蘭喬峻雄麗勝難悉狀世傳敦義朱公宅其陽靈
和攸萃淑媛篤生因名以紀事少秉性貞烈閑中女則
專一誠莊粹如也父原籍兵應戍耄羸弗克供承邑發
徵書孔棘木蘭惕不自安乃更服歛容戒事代征肇離
故里經黃河抵古雪山深入不毛立戰功青海外故曰
萬里赴戎機關山度若飛朔氣傳金析寒光照鐵衣義
勇奮激慷慨悲歌有古名將風時月支授首於闐歸心
燕關無牧馬南下露布上陳天王錫命策勳木蘭復辭
爵懇乞歸養約寓軍十有二年嚴翼共服言笑不苟出

入起居自有繩度每危然獨立不與人羣一時于邁者
畏威莫敢覬視服忠者祇肅莫忍詐探信其磊落奇偉
凡若履貞體願一軍咸莫測及歸免冑理妝屏猛輯柔
見者始而疑中而駭終而慄然歎且慕天下聞之號稱
女丈夫忠孝大節永垂於世誕惟時遠無徵莫稽所終
後之妄倡訛說文飾巔末皆不考古而誣人者罪莫大
焉今蘭麓遺塚猶存國初聞盜竊發風雷衛止塚旁有
祠鄉人歲秩祀以志不忘予童蒙時聞諸母訓敬而信
之自後厯厯考據頗得其實景行淑節特立傳以闡幽
黃陂縣志 卷七 木蘭志 七

云

木蘭將軍序

邑宰 楊廷蘊

凡夫性之所至發而爲忠孝發而爲節義固不以男女
殊也昔漢緹縈泣書救父古今稱其孝烈安在生女不
生男緩急無所恃耶吾於木蘭將軍復見之予向不知
木蘭本末近蒞西陵登樓縱眺見治北六十里許一山
突兀半出霄漢父老相傳以爲木蘭山云予急取陂志
觀之蓋卽有唐貞觀木蘭發跡之地其始固閨中一女
子也父舊隸兵籍有檄徵發羸羸不堪木蘭痛之遂郤

紅妝市兜牟辭父母慨然跨馬越黃河馳黑山戟肩鐵
面出入敵圍誓以殺賊報命凡在軍中者十有二年同
行將士初不知其爲女子也後露布上陳天子不受賞
遂策馬南還入門拜親將軍無恙親戚莫不駭異因開
東閣免甲冑理舊妝向者奇傑之士忽易爲紅顏之女
隨從都頭咸感歎畏服去至今觀古樂府中木蘭代父
從征之辭未嘗不奇其人奇其事想慕其風烈也予於
史見柴夫人臨陣號娘子軍後世傳爲僅事然未有如
木蘭慷慨赴征之尤烈也以閨中一女子而至性自矢
孤行於數千里之外往來於沙漠鋒鏑之間代親遠戍
全身復歸其爲忠孝節義始何如哉嗟嗟天下之爲人
子負七尺軀而長老牖下不能報劬勞於萬一者其視
木蘭可以知愧矣因援筆而紀其事

遊木蘭山記

陳天策

宜興人

縣志治北六十里有木蘭山傳爲初唐女將軍故里也
予讀而疑之疑北郡易水亦有木蘭舊址地旣不一徐
文長稱木蘭代父花弧者從軍姓又各殊讀書人慧心
碧眼肯爲假題目所冒耶然考易水出塞道可不渡黃

河又其俗父稱爹不稱爺合之古樂府木蘭非易水可
借明矣傳奇從無信本四聲猿借題發揮牢騷尤不足
據今古墓儼然山麓里人歲操壺酒豚蹄以奠其爲故
里復奚疑哉丙午春暮得遊茲山鬱拔嵯峨帶長川而
礪羣岫誠有如將軍雄峙萬夫中山靈咸辟易然者緇
衣羽士各寄焚修於其間在將軍正如安插投誠布列
召募或遙恃爲犄角或散給爲連營合全勢以壯陂之
北門鎖鑰誠巖巖名勝哉惟木蘭功高沙漠十二年雖
未肯拜尙書封爵其營置宅第應開府以建大將軍旂

鼓矣顧廟貌咫尺接古坊曾不能中庭旋馬且又併寸題
尺角而堵廛之地偏窄而人誼譁以視焚修諸勝之宏
敞莊嚴不啻天壤夫山以木蘭名千百年於茲矣顧名
以思似應有憫然心目者何是鄉縉紳先生騷人墨士
竟與愚夫婦同懵懵曩今如一轍耶昔李青蓮愛九子
山峰如蓮易名九華盛推海內猶茲山之得名由木蘭
也乃化城金碧擬於王居青蓮僅僅一祠不知廢自何
年近始得三韓張公構椽以表舊跡之萬一夫木蘭青
蓮皆初唐開山之祖顧咸以文章志節根本吾儒見聖

於外道不獲錄卽未嘗盡遭淪滅乃如餽羊之去而僅存碩果之剝而不食良可悼歎况吾儒本教平淡無奇還視青蓮木蘭更如嚼蠟亦安望其見尊流俗耶茲因木蘭以懷青蓮則如木蘭之堪懷者何止青蓮後之撫名山以念木蘭猶予之撫木蘭以望九華也

登木蘭山記

屠 達 南蘭人

楚多名山大澤奇秀甲天下異人往往間出予過楚未能歷覽其勝也昔人云身到處莫放過予心識之間嘗訪三閭之淵問雙鳳之址登黃鶴歌白雲之詩過鸚鵡

黃陂縣志

卷七

木蘭志

十

弔漁陽之鼓臨赤壁想公瑾之英風諷詠坡仙之二賦仰眺橫睇流連不能去一日聞木蘭爲西陵最勝詢之卽唐初女將代父從征者也予每稱木蘭忠孝爲古今第一奇女子而史冊不載嘗稱怪焉今名木蘭卽其故里遺塚宛然非二氏之說荒唐無據者矣予往登之見山勢嵯峨羣峰攢簇爭爲奇狀其偃蹇而下者若牛馬之飲於阿其怒拔而上者若熊羆之登於山翠磴千盤丹崖百尺以至澗斷別開一徑山面忽露數峰岩壑之奇未易彷彿及扳以升百折而上薄暮乃臻絕頂憑眺

其巔勢與雲參烟霏霧結四顧渺然迥出天外誠三楚之極觀也然其間爲寺爲院爲古刹爲新建所在多有而木蘭一祠獨在半山廟貌不展識者訝之時宿僧寮見四方至者貿貿而來諸僧人營營應之亦與城市等無一清修淨地殊歎古今奇勝每因僧人自生塵擾埋沒名山面目茲又其一矣或曰山僧之陋楚俗類然或曰今所稱名僧編山谷其惑世誣民滋甚甯爲此不爲彼是二者予未能辨之

遊木蘭山記

聞

政

晉甯人

黃陂縣志

卷七

木蘭志

十一

天下名勝誰不欲身至而歷覽之哉然亦有幸不幸於其間也楚黃北數十里有木蘭山突兀雲霄菁葱可愛予至陂閱兩年所神游已久往往裹足不得前深歎與山靈之寡緣也丙午暮春偕簡翁銘翁諸先生一至其地甫抵山麓見峰勢嶙峋怪石欲壓松濤習習聲滿林谷下馬凝立不寒而凜徐步至下古寺四面絕壁寒翠欲流澗水潺潺一若琴聲從指下出者倚樹久之不能去旣而諸先生至共駕肩輿從東北曲折而上不百武爲準提閣面東而立山色可餐又百武爲普陀巖石懸

半山藤蘿下引紫花錯落忽見一橋平跨小澗過此路甚險側視之勢欲將墜者予惛然下輿捫衣步行上幾二里回頭下古寺已不可復得矣突見一刹倚崖臨空磬聲隱隱則爲上古寺其前古木蒼然以深其後諸峰傑然而起問之則爲捨身岩是山之最峭者仰視山花紅麗掩映上下不禁歎異之過此曲折而東路逼窄又下輿行數十武見一石橫路旁高數丈許其形似虎青苔鱗鱗與人謂我曰此襯腰石也山行者以小石撐之能有力焉予不覺失笑又里許觀音閣對列羽衣錯處

黃陂縣志

卷七

木蘭志

三

有一岐路南上則東泉菴北上則爲一天門因曲折而北山路陡絕努力百級則爲木蘭將軍祠祠宇狹隘傍爲行貨者所居嗟乎山以木蘭名則木蘭其主也而其他梵宮道觀宏敞高大擬於王者而茲亘古奇傑之一人乃落落塵封半爲客棧殊可怪異復一折而北山愈峭徑愈絕地愈勝足不能上予思遊山不及頂不能盡山之奇而且負茲遊也因僂僂攀索而進未數武而力已憊矣因坐少頃作吳牛喘兩股頻嘶相視諸先生亦皆汗浹於面童僕無人色與人相扶復上數十級至真

武殿方闊數十丈憑高振衣若與天近南望武昌漢水
鶴樓鳳凰之勝隱然見題詩崔子玉笛仙人焉其北則
光羅諸山若遠若近若隱若見叔敖衣冠葛洪紅杏髣
髴在目而春申遺烈猶有存者西望孝昌則思鬪穀於
菟之忠董公永之孝東俯齊安慨然太息念東坡赤壁
雪堂竹樓之勝而未及一至徘徊四顧恍惚欲仙又曲
折而西一峰忽起上爲玉皇閣傍爲聖母祠前俱石欄
憑闌俯視壁立千仞深不可測遠見上古寺寒烟一簇
於樹影中與諸先生少憩石盤而殘霞片片半落西山
黃陂縣志 卷七 木蘭志 三

日云暮矣山僧前導別從一徑而下至半山宿於觀音
閣因謂僧曰山有白雲洞木蘭塚去此幾何僧曰不過
五里許相與期作明日遊乃是夕春雨蕭蕭竟夜不止
曉起視之濃霧滿山歸路盡失古洞在望杳不可卽噫
嘻旣得與於茲山之遊而不能盡茲山之勝豈非幽巖
絕巘得至與不得至有幸有不幸歟不得已遂崎嶇躑
躅而歸俯仰山容怏怏若失惟有夾谷細香觸鼻而至
松枝濕翠點染衣袂而已低徊思之雖不能盡探此山
之奇而其大概已恍然在目矣因約略爲之記

留青日札曰木蘭乃朱氏女子代父從征黃陂人縣西北七十里。有木蘭山。上有將軍塚。忠烈廟。焉足以補樂府木蘭詞題解之缺。○白樂天題木蘭花云。怪得獨饒脂粉態。木蘭曾作女郎來。杜牧有木蘭廟詩。彎弓征戰作男兒。夢裏曾驚與畫眉。幾度思歸還把酒。拂雲堆上祝明妃。既有廟貌。則誠有其人矣。余按木蘭爲陂邑女子。鑿鑿可據。而陳愚谷續修省志。據本詞語。朝辭爺娘去。暮宿黃河邊。以爲非陂人。獨不思朝辭黃河去。暮宿黑山頭。豈北征祇兩日路程乎。又查名勝志。湖廣黃

黃陂縣志

卷七

木蘭志

西

州府有木蘭將軍者。朱氏女。詐作男子。代父西征。明明以其時黃陂正隸黃州府。因別本訛作商邱人。遂生疑誤。

王之斌
邑人

木蘭將軍出征見古樂府

唧唧復唧唧。木蘭當戶織。不聞機杼聲。惟聞女歎息。問女何所思。問女何所憶。女亦無所思。女亦無所憶。昨夜見軍帖。可汗大點兵。兵書十二卷。卷卷有爺名。阿爺無大兒。木蘭無長兄。願爲市鞍馬。從此替爺征。西市買駿馬。東市買鞍韉。南市買轡頭。北市買長鞭。旦辭爺娘去。

暮宿黃河邊不聞爺娘喚女聲但聞黃河流水鳴濺濺
巨辭黃河去暮宿黑山頭不聞爺娘喚女聲但聞燕山
胡騎嗚啾啾萬里赴戎機關山渡若飛朔氣傳金柝寒
光襲鐵衣將軍百戰死壯士十年歸歸來見天子天子
坐明堂策勳十二卷賞賜百千鎰可汗問所欲木蘭不
用尚書郎願借明駝千里足送兒還故鄉爺娘聞女來
出郭相扶將阿姊聞妹來當戶理紅妝小弟聞姊來磨
刀霍霍向豬羊開我東閣門坐我西間牀脫我戰時袍
著我舊時裳當窗理雲鬢對鏡帖花黃出門看火伴火
黃陂縣志

卷七

木蘭志

十五

又

木蘭抱杼嗟借問復爲誰欲問所憾憾感激強其頤老
父隸兵籍氣力日衰耗豈足萬里行有子復尙少胡沙
沒馬足胡風裂人膚老父舊羸病何以強自扶木蘭代
父去秣馬備戎行易卻綺羅裳洗去鉛粉妝馳馬赴軍
幕慷慨攜干將朝屯雪山下暮宿青海傍夜襲燕然虜
更攜於闐羗將軍得勝歸士卒還故鄉父母見木蘭喜

極成悲傷木蘭能承父母顏卸卻金鞵理絲黃昔爲烈士雄今復嬌子容親戚攜酒賀父姥始知生女與男同門前舊軍都十年共崎嶇本結兄弟友死戰誓不渝今也見木蘭言聲雖是顏貌殊驚愕不敢前歎息徒嘻吁世有臣子心能如木蘭節忠孝兩不渝千古之名焉可滅

木蘭將軍歌

張濤 邑人

木蘭山上青草發將軍塚裡埋香骨殺氣應隨豔魄消貞心不向征魂沒憶昔當年聞鼓聲曾拋機杼逐旌旗

黃陂縣志

卷七

木蘭志

六

卽戎非女子市韉有男兒誓把雄心赴金柝鳴鞭直抵長城窟寶劍磨殘黑水雲雕弓彎破陰山月英雄陣骨幾成灰十二年來百戰回故園砧杵無人怨絕塞征衣好自裁絕塞烟塵一朝掃捷書飛出關山道含羞蔡女拍中笳掉臂明妃墳上草邊草胡笳別寒雲征人誰識女將軍願題彤管篇中字不羨燕然石上勳惆悵歸來啟故閨空房猶閉舊支機羅襦香冷鴛鴦死蘭帳塵生燕子飛燕子鴛鴦幾度春還閨原是別閨身背上舊沙痕未脫眉間新黛憾還顰可憐烈女腔中血不死沙場

死閨閣百年心冽匣中霜數寸腸分衣上鐵千載孤墳
過客悲紅顏薄命寄芳祠一函金甲爲同穴三尺青鋒
是故知我賦大招招未還難堪杜宇泣空山祠前明月
朝朝鏡壠上屯雲歲歲鬢君不見漢寢唐陵臥鹿麋故
都禾黍歎離離惟有木蘭墳不改青山獨自屬蛾眉

木蘭歌

陳天策

我聞木蘭一女子代父從軍不惜死女也男乎誰得知
六尺龍蛇乃如此泣辭爺妹列戎行甘苦親同士卒嘗
羽插御林天可汗鐵衣敢畏征途長一十二年戰場裏

黃陂縣志

卷七

木蘭志

七

伏劔鳴弦銳無比陰山壘築韓夫人瀚海軍開李娘子
陣勢旌旗塞弗絕忽走銜枚風斷舌黃沙綠海排飛濤
馬隊殘春踏冬雪日落還營南望歌聲聲怨殺渡黃河
黃河一渡遠膝下翻使親悲女枕戈捷書一旦露章上
天子咨嗟稱偉壯列名賜賞懸通侯木蘭但乞歸無恙
玉門生入自古稀凱旋聯轡搥鼙鞞死生音耗久不一
舉家覲面看如迷將軍丰采號英特忽改紅粧另一格
都從健兒各自嗟何爲同隊殊阡陌蛾眉燕領原截如
木蘭一轍同與徐從此不敢量巾幗還笑男兒讀父書

懷木蘭將軍

杜牧之

彎弓征戰作男兒
夢裏曾經與畫眉
幾度思歸還把酒
拂雲堆上祝明妃

懷木蘭將軍

出塞男兒面歸來
女子身尙能降北虜
斷不慕東隣

題木蘭祠

屠達

躍馬揮戈絕域還
角巾歸第舊嬋娟
十年長劔倚天外
一日紅妝拜膝前
城號夫人應竝烈
谷名孝子賢

峇峇山色垂千古
不啻丹青磨閣傳

黃陂縣志

卷七

木蘭志

六

承歡祠記

張安慶

邑人

自來奇忠純孝光宇宙
耀古今者其德徽必有所由始
而崇奉必及其所由生
況巾幗英雄以忠成孝如木蘭
將軍其能已於上祀之典哉
將軍自明開府張公濤奏
請立祠俎豆馨香已垂不朽
而其報本之禮固猶闕如
也
同治壬戌先君子與宗禕園封翁
燕推堂茂才稟請
設臺講約嗣宗封翁與邑諸君
倡建自新堂興諸善舉
凡忠孝節義之有關風化必公
請建坊入祠焉
去年秋
李君鵠丞楊君西岐黃君景薌與
余講約之木蘭山山

中小住數日偶登高峰見山南里許層巒翠嶂聳若列
屏危牆隱隱露焉土人告余曰此祈嗣頂也卽木蘭將
軍父當日祈嗣處也余記之次日偕同人往遊至則蘭
若塵清佛龕篆裊內一椽供奉將軍與在山半者無異
余慨然曰將軍父祈嗣而生將軍今將軍香不絕不聞
有壺酒隻蹄爲將軍父母奠者揆諸替爺報國之心殊
有未慰昔宋賢兩程夫子誕降於茲載在祀典旣已饗
及其親以後例前於將軍亦宜然偕遊者咸是其言歸
商構園封翁翁曰此堂中責也近來忠孝節義由堂中

黃陂縣志

卷七

木蘭志

九

呈請表揚者不下數百獨不能爲將軍父母建一祠以
慰將軍孝思乎陳君星海聞之踴躍贊成同前遊覽諸
君暨袁君端甫再登山頂經營其事相與邀張君福波
張君仍房游君金階潘君竹屏籌資建祠於祈嗣頂正
殿一楹中奉將軍父母像將軍側坐兩童侍焉左右兩
廊一奉從軍七將位一作馬房基接古佛殿之後顏曰
承歡祠於是年十月鳩工庀材至臘月告成邑之人稱
快而將軍在天之靈庶無歉矣嗟乎將軍行在倫常事
由至性爲天下人所當矜式卽天下人所當敬奉倘得

當事奏請於

海內建祠奉祀則邀

而孝德愈彰經表揚而觀感益眾是祠發端之始耳是
爲記

庠生涂道詠校對

重刊

卷七

木蘭志

三

漢鎮湯積秀刊